

17 MAR 1996

PEGUAM SEMENANJUNG BEBAS JALANKAN PENGAMALAN DI SABAH/S'WAK

KUCHING, 17 Mac (Bernama) -- Peguam di Semenanjung akan dapat menjalankan pengamalan perguaman secara bebas di Sabah dan Sarawak tidak lama lagi apabila semua pihak setuju dan faham sensitiviti satu sama lain.

Ketua Menteri Sarawak, Tan Sri Taib Mahmud berkata "batu penghalang" dalam hubungan rapat antara kalangan peguam di Sabah, Sarawak dan Semenanjung akan berakhir tidak lama lagi.

Berucap di majlis makan malam bagi mengakhiri persidangan tahunan hakim-hakim di sini malam tadi, Taib berkata hakim-hakim perlu menghayati undang-undang yang berfaedah kepada masyarakat daripada hanya mematuhi prosedur membuta tuli.

Beliau berkata hakim-hakim juga perlu menerima perubahan supaya orang ramai mendapat penghakiman yang adil dan wajar.

Katanya, pembangunan pesat yang dialami negara sekarang memerlukan hakim yang peka agar perbuatan jenayah kolar putih dapat dibendung dan dibanteras.

Ketua Hakim Negara Tan Sri Mohd Eusoff Chin adalah antara 75 orang hakim Mahkamah Persekutuan, Mahkamah Rayuan dan Mahkamah Tinggi yang menghadiri persidangan dua hari itu yang dirasmikan oleh Perdana Menteri, Datuk Seri Dr Mahathir Mohamad. -- BERNAMA.

RDY OBA.